

SCRIPT OF EVENING GOJRI NEWS BULLETIN 30OCT 1700 HRS

ایونینگ گو جری نیوز بلیٹن مورخہ 30 اکتوبر 2025

یوہ آکا شوانی جموں ہے محمد اشفاق تے نصرت چوہدری تیں خبر سُنو۔

HEADLINES

۱۔ دبشت گردی گا معاملن سنگ جُڑیا دو سرکاری ملازمان ن نانہ نوکری تیں برطرف کردتو گیو ہے۔

۲۔ وزیر اعلیٰ عمر عبداللہ نے کہیو ہے جے بدھتی وی آبادی تے پیڑ پاڑ غے پیش نظر عام غریب عوام واسطے نویں ہاوسنگ کالونی بنائی جارئی ہیں۔

۳۔ وزیر تعلیم سکینہ اتو غو کہنو ہے جے سرکار جموں کشمیر اندر بُنیادی تعلیمی ڈھانچہ نانہ بہتر بنان واسطے وعدہ بند ہے۔

۴۔ جموں کشمیر قانون ساز اسمبلی نے اج چار بلاں نانہ منظوری دتی ہے جن ماتہ کرایہ داری غا معاملات، پنچائیت، لیبر تے کوآپریٹوئیز سوسائٹی بارے بل شامل ہیں۔

۵۔ سیلاب زدگان بارے معاملات ور تبادلہ خیال گا مطالبہ نا منسوخ کرن ور بی جے پی گا ایم ایل ایز نے ایوان نانہ چھوڑ غے بار نکل جان غو فیصلو کیو۔

LG EMPLOYEES SUSPENDED

لیفٹیننٹ گورنر منوج سنہا نے اج 2 سرکاری ملازمان نانہ مبینہ دبشت گردی تیں تعلقات غ الزام ماتہ نوکری تیں کڑن غو حکم جاری کیو آکاشوانی جموں گانماندہ غے مطابق ان ملازم غی شناخت گلام حسین تے مجید اقبال ڈار غا طور ور ہوئی ہے جہڑا محکمہ تعلیم ماتہ بطور استاد اپنی خدمات دے ربیا تھا حسین ریاسی ضلع غی مہور تحصیل گا گراں کلوا ملاس غو رہائشی ہے جد کہ ڈار راجوری ضلع غا علاقہ کھیورہ وارڈ نمبر 1 غو رہن آلو ہے برطرف حکم نامہ ماتہ کہیو گیو ہے کہ ایل جی موصوف نے تمام حقائق تے حالات گو جائیزو لیتا واں ان دواں ملازمین غی سرگرمی غے مدد نظر انہاں نانہ ملازمت تیں برطرف غو حکم دتو ہے۔

CM HOUSING COLONIES

جموں کشمیر سرکار نے اج قانون ساز اسمبلی ماتہ بدھتی آبادی تے پیڑ پاڑ گا باہدا گے پیش نظر مسئلہ نانہ حل کر خاطر پردھان منتری آواس یوجنا غے تحت بکھ بکھ ہاوسنگ پروجیکٹ شروع کرن بارے تبادلہ خیال کیو گیو اس زمین ماتہ نیشنل کانفرنس گا سننیر ایم ایل اے علی محمد ساگر گی طرفوں چایا گیا اک سوال غو جواب دیتا واں سرکار نے دسیو جے اقتصادی طور کمزور طبقہ یعنی ای ڈبلیو ایس واسطے مرکزی زیر انتظام جموں کشمیر ماتہ بکھ بکھ ضلاع ماتہ ہاوسنگ کالونی تیار کی جارئی ہیں۔ تے جواب ماتہ دسیو گیو ہے جے ای ڈبلیو ایس واسطے قریب 760 فلیٹ کوٹ بلوال جموں ماتہ زیر تعمیر ہیں جد کہ 304 فلیٹ ادھمپور گا چکھری تے سندلی ماتہ تعمیر کیا جارہیا ہیں۔

ITOO ORIENTATION

تعلیم غی وزیر سکینہ اتو نے اج بچاں غی ابتدائی دیکھ بھال تے تعلیم واسطے آیا یعنی مددگار خواتین غی تربیتی ور کشاپ مانہ خطاب کیو یے پروگرام جے اینڈ کے ایس سی ای آر ٹی تے جموں کشمیر سوشل ورکرز ایسوسی ایشن تے یونی شیف غا تعاون تیں پوشن، پیار اور پرورش بچاں غی دیکھ بھال تیں بکھرتی زندگی غا موضوع ور منعقد کیو۔ خطاب غے دوران محترمہ سکینہ اتو نے کہیو کہ حکومت بچاں غی بہتر پرورش تے تعلیم واسطے پُر عزم ہے۔

REASI CHILD HELPDESK

بچاں اگ تحفظ تے فلاح غا نظام نانہ مضبوط بنان واسطے ایک اہم قدم اگ طورور ڈپٹی کمشنر ریاسی ندھی ملک نے ریاسی بس اڈہ ور 24 سو گھنٹہ بچاں غی مددگار مرکز غو افتتاح کیو۔ یے ہیلپ ڈسک وزارت کواتین تے بچاں غی نشونما مشن وٹسلا سکیم غے تحت ضلع انتظامیہ ریاسی گا تعاون تیں قائم کیو گیو۔ اس غو مقصد ایسا بچاں نانہ فوری مدد سہارو تے تحفظ فراہم کرنو ہے جہڑا لاپتی ہے سہارا گمشدہ یا کسی مشکل حالت مانہ پایا جیں اس بارے مزید معلومات فراہم کرتا وں ریاسی ضلع غا چائلڈ پروٹیکشن افسر سچن شرما نے اس طرح کہیو۔

YOUTH FESTIVAL

ضلع نوجوان خدمات تے کھیڈ کود بارے محکماں کی طرفوں اج سرکاری ڈگری کالج مانہ بکھ بکھ زونل سطح ور نوجواناں بارے ایک میلا گو انعقاد کیو گیو اس دوران ضلع گا بکھ بکھ حصہ توں قریب 100 گی تعداد مانہ طلبہ نے شرکت کی جس مانہ اُن غی کلا، تے ثقافتی صلاحیتاں نانہ اُجاگر کرن گو موقف دتو گیو اس تقریب گو افتتاح سرکاری ڈگری کالج پونچھ گا پرنسپل پروفیسر جسبیر سنگھ نے کیو تے وے اس موقع ور مہمان خصوصی تھا آکاشوانی سنگ گل کرتا وں پونچھ گا نوجوان خدمات تے کھیڈ کود بارے افسر محمد قاسم نے اس طرح کہیو۔

LA BILLS PASSED

جموں کشمیر قانون ساز اسمبلی نے اج چار اہم بلاں نانہ منظوری دتی ہے جنکو مقصد قانونی نفاذ نانہ مضبوط کرنو کرایہ دار تے جائیداد مالکاں گا حقوق گو تحفظ مزدوراں غا حالات مانہ بہتری لینی تے کوپریٹیو ڈھانچہ مانہ صوتی ووٹ توں اصلاح کرنی ہے۔ وزیر اعلیٰ عمر عبداللہ نے رینٹ ریگو لائزیشن بل 2025 نانہ منظور کرایو تے کرایہ داری معاملات مانہ منظم کرن تے تنازعات نانہ بروقت حل کرن نانہ یقینی بنا خاطر ایک رینٹ اتھارٹی قائم کی تے یوہ وی واضع رہ جے دیہی ترقی تے پنچائتی راج گا وزیر جاوید احمد ڈار نے نچلی سطح ور جمہوریت مانہ بابدو دین خاطر تے کاپریٹیو سوسائٹی نانہ ہموار کرن خاطر دو بلاں نانہ پیش کیو ان مانہ پنچائتی راج ترمیمی بل 2025 تے کوآپریٹیو سوسائٹی ترمیمی بل 2025 شامل ہیں اس تیں علاوہ نائب وزیر اعلیٰ سریندر چودھری نے روزگار تے خدمات گا خواہات بارے شاپس اینڈ اسٹبلشمنٹ بل 2025 متعارف کرایو جس سنگ مزدوراں گا حقوق کا تحفظ بارے لیبر قانون نانہ مضبوط کیو گیو۔

BJP WALKOUT

حزب اختلاف مانہ بی جے پی گا ایم ایل ایز نارا ضگی جتاتاں واں اُس ویلے قانون ساز اسمبلی توں باہر نکل گیا جد سیلاب زدگان بارے سرکار نے کوئے تبادلہ خیال نہ کیو اس سلسلہ مانہ پورا سوالید گھنٹاں توڑی کھلا رہن توں بعد وے اسمبلی توں باہر نکل گیا پورا اجلاس غے دوران حزب اختلاف ممبران کھلا رہیا تے جموں تے دیگر علاقان مانہ سیلابی تباہی بارے تبادلہ خیال گو مطالبو کیو گیو جس ور کوئے خاص تو جو نی دتی گئی اس دوران سپیکر اسمبلی عبدالرحیم راتھر نے اُنہاں نانہ اپنا نشستیں ور بیسن غی اپیل کی تانجے وقفہ سوالات نانہ اگے بدھایو جاسکے بی جے پی گا اس اجلاس چھوڑن گا رویہ بارے بولتا واں جل شکتی گا وزیر جاوید احمد رانا نے اس طرح کہیو۔

ROSTERS

جموں کشمیر حکومت نے نومبر تے دسمبر غا مہیناں واسطے اپا 5 وزراں غو شیڈیول جاری کیو ہے تانجے 3 نومبر تیں 5 دسمبر توڑی سیول سیکرٹریٹ سرینگر مانہ عوامی شکایات سُنن واسطے دستیاب ریں اس حکم نامہ غے مطابق وزیر جاوید احمد رانا سکینہ اتو ستیش شرما سریندر چوہدری تے جاوید احمد دار اس دوران سیکرٹریٹ مانہ موجود ریں گا اسی دوران حکومت نے انتظامی سیکرٹری غو وی شیڈیول جاری کیو ہے جہرا نومبر 2025 غا مہینہ مانہ باری باری سول سیکرٹریٹ سرینگر مانہ ڈیوٹی دیں گا۔

DODA WOMENS CRICKET

ڈوڈہ پولیس نے سیوک ایکشن پروگرام غے تحت خواتین بارے ایک کرکٹ ٹورنامنٹ گو انعقاد کیو جس غو مقصد خواتین نانہ باختیار بنان تے نوجوان لڑکیاں نانہ کھیڈ کود بارے متوجہ کرنو ہے اس ٹورنامنٹ گو افتتاح ایس ایس پی ڈوڈہ سندپ مہتا نے کیو تے اُنہاں نے شرکاء ورزور دتو جے وے نظم و ضبط و عزم تے پیش وارانہ مہارت سنگ اپنی صلاحیتاں گو مظاہر کریں اس پروگرام مانہ ضلع پر گا بکھ بکھ تعلیمی ادارہ بیچوں طلبات نے شرکت کی اس بارے بولتا واں ایس ایس پی ڈوڈہ نے اس طرح کہیو۔

KISHTWAR SEMINAR

ایس ایس پی کشتواڑ نریش سنگھ غی ہدایت ور پولیس سٹیشن چھاترو نے پولیس شہداء غی یاد مانہ ایک سیمینار منعقد کیو یوہ پروگرام سیوک ایکشن غے تحت منعقد ہوویاہ تقریب گورنمنٹ ہائر سکینڈری سکول چھاترو مانہ مشترکہ طور ور منعقد کی گئی جس غو موضوع تھو قومی سلامتی، ترقی یافتہ تے متحد بھارت غی تعمیر اے ایس پی، پی سی کشتواڑ نصار احمد سی ای او کشتواڑ سنجے کمار ڈیڈ ای او پرنسپل چھاترو ایس ایچ او پی ایس چھاترو انسپکٹر وکرم سنگھ تے دیگر افسراں نے معالوماتی تے حوصلہ افزا لیکچر دتا۔
